

欽定剿平三省邪匪方略

欽定剿平三省邪匪方略正編卷一百六十九

庚申年

四月二十五日

未額勒登保奏言竊

臣

查探張

世龍張添倫戴家營等股賊匪先後均向五郎

一帶奔竄十一二三等日從水田坪僭程前行

覓道截擊十四日晚抵火鑱溝偵知賊匪在松

樹壩龍王溝西河腦等處據掠詢問山勢險峻

到處多係深溝未便一路進兵當將所帶官兵

分爲三路令楊遇春格布舍傳陞豐紳等帶領
馬步官兵上左山梁躡路而進岱森保穆克登
布色玉慎福忠阿劉瑞等上右山梁躡路而進
臣親帶安福喜明胡定泰等取道溝內前進均
於四鼓拔營該匪等聞有官兵星夜逃竄我軍
跟蹤緊躡連翻七重大山約行一百餘里至大
小蕉溝燕子嶺追及賊匪楊遇春岱森保率領

官兵將賊衝爲數段箭射矛戳斃賊一百餘人

臣

督兵抄入大小蕉溝趁該匪等奔竄之時催

令官兵疊殲賊匪楊遇春穆克登布等兩路之

兵又已追下山坡各官兵於亂石夾礮中奮力

截擊二十餘里殺賊二百餘人賊又翻山四竄

時已昏暮令卽駐營將生擒之楊維華等二十

六名逐加訊問據供此股賊匪係張添倫爲首

目前本與張世龍戴家營合爲一股據有民人
拷問知官兵將到張世龍戴家營分作數路先
走並訊該犯等皆係張添倫股內父子手當卽
一併正法十六日一面搜捕一面督兵前進所
有搜獲之人隨時訊問確係賊匪立卽斬戮有
實屬附近被擄之民當經給票釋放並於沿途
經官兵民人拏獲賊匪差來探聽消息之吳和

富張世羣魏保劉相國四犯或裝作商販背負
包穀或割去髮辮充作難民詭詐已極然其舉
動荒張語言不對逐加盤詰知張添倫股匪經
我軍剿潰後總向老山中穿越不知何路官兵
到來故令各該犯出來探聽餘無要供當卽凌
遲處死適據探報又有一股賊匪人數甚多從
盤波霸王灘月河等處徑向鎮安而去查鎮安

係屬縣城雖有富成帶領官兵一千餘名在彼
駐守或恐衆寡不敵十七日督兵儘力趕行一
百四十餘里前抵霸王灘聞賊匪已過月河

臣

令官兵等暫行憩息均於三更造飯四鼓啟行
令鍋帳等隨後行走抄道直趨鎮安於典子梁
望見烟焰四起逼近城垣維時富成帶有官兵
數百名迎擊鎗聲不絕

臣

督率馬步各官兵趕

繁行走賊匪見有大兵踵至卽上城後之北山

梁東入無峪溝臣令馬隊官兵直前衝殺斃賊

枕藉於道眼見馬上滾落一賊帶有兩箭查係

馬兵固倫保殷占魁所射我軍乘勝追出十餘

里之干溪口賊之前起正在民房造飯一時慌

忙亂竄我軍奮力斬戮統計殺賊共三百餘名

賊衆分竄其騾馬器械旗幟等項拋擲無算官

兵行走已有一百五十餘里不能再進訊問臨陣生擒之姚學賢等十三名知此股賊匪係戴掌櫃所領昨日夜間由雲蓋寺王家坪起身要在鎮安城外搶糧若得燒搶城池多得牲口卽往商州一路前至河南轉至湖北就獲者多係戰手其箭斃落馬之賊割取首級令名該犯指認僉稱係僞元帥名余作愷向在後面領賊當

卽一併處死又所獲之李廷輔舒明遠等三十

二名實係被擄概予省釋臣查節次獲賊所供

均有欲往河南之語并探伍金柱揚開甲等股

賊匪合計共有二萬餘人已向山陽一路東竄

恐此股賊匪亦奔山陽臣前以東面最關緊要

國霖在商州堵截帶領官兵僅有一千六百餘

名未足深恃疊經知會恒瑞帶兵就近前赴山

陽總以相機截賊不致闖入豫省爲要近接恒
瑞來信前在小河口小中溪一帶與柯藩等截
住伍金柱分股竄匪斃賊一百餘名生擒查其
賢等六犯帶兵向西北追剿今臣在干溪溝據

探報恒瑞帶同劉之仁於十五日已向山陽前
去並留柯藩在大山岔堵截賊匪甚爲得要但
恒瑞劉之仁等帶領兵勇亦祇五千餘名尙覺

賈薄臣此時先其所急卽緊跟戴家營之賊趕

赴山陽總期緊頭東面賊匪不能竄過山陽商

雜卽無慮竄入豫境且那彥成帶兵由漢陰而

來知大股賊匪已在東面自必探蹤趕進得有

數路重兵截剿定可期於得濟再鎮安城外附

近居民聞有賊匪多已避入城內及翻山藏匿

而猝被燒搶之家計有七八十戶情殊可憫

臣

已每戶酌給銀一二三兩以示撫卹鎮安係賊
匪往來熟路富成仍留駐鎮安城外堵禦此番
運次打仗兵勇傷亡不過數人容另咨部辦理
查直隸撫標喜峯路遊擊祿德以二月十九日
隨多爾濟札普等追賊至洵陽屬之三岔河奮
力殺賊咽喉猝受矛傷二處右膀受石傷一處
至今頸項不能擡起右膀亦未能舉動經臣
委

驗屬實可否令其緩程回至直隸原營調理之
處出自

天恩奏入

上命軍機大臣傳諭額勒登保那彥成長麟台布曰
鎮安一帶竄匪經額勒登保督率官兵殲斃三百
餘名生擒姚學賢等十三名訊據獲犯供稱此股
竄匪欲由鎮安前往商州並至河南轉到湖北等

語陝省東面與豫境毗連最關緊要額勒登保那
彥成自應通盤籌畫早爲佈置俾賊匪不至東竄
乃伊等俱帶兵自西而東併力追逼至賊匪日漸
東趨始知豫省邊防緊要已屬遲緩焉有兵勇如
許之多任聽各股敗殘餘匪肆行奔突又不知緩
急輕重仍前尾追額勒登保現已親自督兵前在
山陽剿辦那彥成帶兵由漢陰而來自必探蹤前

進如能緊顧東面不令竄入豫省邊界尙是伊等造化此時自應彼此關會繞至賊前奮力截剿如能將大股賊匪由東截向西路去豫漸遠朕卽當加恩賞還伊二人花翎若竟能在陝省境內將各股竄匪盡數殄滅並當另加世職重賞伊二人再不併力抄擊竟任賊匪竄往河南是旣經踈縱於前又不能補救於後則伊二人之罪較魁倫尤重

矣再此時陝省分竄之賊俱已轟出南山老林則
當防其復行竄入額勒登保那彥成務當督飭各
路領兵將弁卽於平行地方奮力剿盡並責成長
麟台布等將賊匪可竄老林之路逐一查明設法
預行挖斷蹊徑或各派鄉勇嚴密防堵勿令賊匪
被剿緊急又復竄回老林致剿捕有稽時日遊擊
祿德打仗受傷者准其回至直隸原營調治如因

傷病故卽咨部照陣亡例賜卹

同日松筠奏言臣連接明亮倭什布來信知本

月初一初二等日督師在遠安苟家垵地方趕

上賊隊直前邀擊斬獲頗多並生擒周文興等

三十二名賊遂向東南奔逸意欲徑趨當陽經

總兵王凱扼要截住該匪復折竄東湖之霧渡

河明亮倭什布親率兵勇冒雨從西布口抄道

前進卽在霧渡河大山坵殲殺步賊二百餘人
鎗斃馬賊二名擒獲夥匪八十七名初四日我
兵進抵學堂坪隨據差弁探報賊匪奔竄與山
被鄉勇截回現在水月寺兩旁老林內四散潛
伏希冀乘間抄襲等情嗣拿獲賊探馬林周雲
高二犯訊同前由明亮倭什布卽於初六日派
令副將英雄楚叅將海麟等酌帶弁兵分投誘

賊總兵孫清元叅將吉赫泰都司何天標等由
東面進發叅將烏爾卿額遊擊胥泗起守備吳
純俊等從西面前進明亮倭什布統領大隊由
中路直入果見賊匪吶喊四起勢甚兇悍官兵
併力扼捕共斃賊三百六十餘人生擒賊目謝
文高及活賊七十一名散出被裹男婦二百餘
名口餘匪卽由興山後界坪竄至保康房縣邊

界初九日復經孫清元吉林泰等趕上剿殺賊
匪一百餘名生擒王連富等二十九名均隨時
分別辦理其投出難民亦俱按名賞給路票口
糧俾各回家安業刻下如黃號白號線字號均
在興山之清楊坪冷盤堽等處而青城賊匪經
派赴均州堵禦之荊州協領富魁委協領百順
等帶領兵弁自北而南併力兜截賊匪遂折入

房縣境內維時明亮倭什布亦帶兵繞至房也
相機協辦又據恩廬合候補知府尹英圖署歸
州知州戴聖哲與山縣知縣朱宗騰等稟稱曰
前賊匪奔撲興山之牛皮埡等卡當各帶領恩
施興山軍功義首譚殿元王大用余升劉魁等
二十四人及歸州梅灘溝義首人等率勇三面
競進擊斃執旗賊目李覺真及首逆樊人傑之

兄樊人倫並殺斃夥匪百十餘人生擒活賊二
名奪獲鎗矛一百餘件牛馬衣服無數俱已分
賞衆勇又據防守鄆西之道員恒慶遊擊周龍
章知縣孔繼榘等稟稱陝西洵陽鎮安一帶鼠
匪前已擾至西岔河距鄆邑之關防舖朝陽溝
牛心石等處甚近現在添募鄉勇竭力堵剿各
等語伏惟

聖主塵念軍務

銜肝焦勞茲閱明亮來信尙稱未經奉到

諭旨而臣前由南漳遣赴軍營之人至今未回自係

楚北雨水過多大路溪河汎漲文報致被阻隔

臣既已得信自應繕摺馳奏仰慰

聖懷奏入

上命軍機大臣傳諭明亮倭什布曰楚省各股賊匪

節經降旨專交明亮督辦其防堵卡隘並闡截竄
匪等事專交倭什布辦理伊等自應將軍營打仗
堵禦各情形隨時奏報以慰廑注乃至二十餘日
並無一言奏及豈不知朕盼望軍報宵旰靡寧耶
卽云楚省雨水過多溪河阻滯何以明亮等與松
筠之信又能遞到殊不可解現在黃號白號及線
字號賊匪俱在興山之清楊坪冷盤垵等處青號

賊匪折入房縣境內明亮倭什布務須相機截剿
趕緊辦竣倭什布在本省防守明亮帶領勝兵卽
由鄖西就近赴陝幫同額勒登保等剿捕各股竄
匪毋得再有遲延自干重咎又本日額勒登保奏
訊據獲犯供稱戴掌櫃一股要從商州一路前至
河南轉到湖北等語陝西洵陽鎮安一帶與湖北
鄖西相距不遠陝境大股賊匪勢欲東趨現今額

勒登保那彥成繞赴賊前迎頭擊截自可不致闌入東面但恐被剿情急賊匪又思逃入楚境則竹山竹谿等處急宜預爲籌備著明亮倭什布飛飭在鄖西防守之道員恒慶等於各處卡隘督率兵勇嚴密防範勿使一名闖入

同日

上命軍機大臣傳諭吳熊光曰自剿辦教匪以來調

兵省分節經降旨令該督撫召募足額以實營伍而重巡防然百姓往往樂當鄉勇而不願充伍食糧共一經入伍卽須遵奉營規約束不若充當鄉勇可以來去自如而所得鹽菜口糧又較兵丁分例爲多是以招集鄉勇較易而召募兵丁轉難前因陝境賊匪向東奔竄豫省邊界與陝省商州雒南一帶在在毗連恐豫省兵勇不敷防堵已添調

直隸山東山西兵共五千名迅速趕赴盧氏一帶
交吳熊光分撥防堵但該三省地方俱係密邇京
畿營伍皆當充實亦不宜久戍河南莫若使百姓
等各顧身家自行捍衛况賊匪分股逃竄裹脅多
人其數總不及良民百分之一是以兵禦賊其力
尙分而以民禦賊其勢易集若平時不加團練賊
至倉猝無備何以守禦卽如川省賊匪竄越潼河

時簡州知州毛大瀛射洪縣知縣張位中署南部
縣知縣王贊武皆因竭力堵賊陣亡深堪嘉許在
守土之臣効命捐軀原屬義所當然惟是賊蹤未
至之時漫無守禦及賊氛已逼徒以一死塞責其
情固覺可憫而於事究屬無益不若早爲區畫俾
人自爲守以收衆志成城之效特愚民無知每於
賊匪未至之先一有傳聞其少壯者卽紛紛遠避

而所留者祇係老弱婦女以致賊匪到時毫無守
禦任其肆行荼毒焚燬室廬卽使賊退後陸續歸
里而村莊廬舍蕩然無存仍屬流離失所此固緣
承平日久百姓等目不覩兵革之事偶因風鶴訛
傳卽至倉惶失措亦由地方官平日不能預爲勸
諭以致民志不堅難靜易動也現在陝省賊匪漸
次東趨豫省如陝州盧氏浙川閬鄉靈寶各處緊

按陝省著吳熊光轉飭地方官出示曉諭愷切開導以爾等安享昇平未經兵革一聞賊至未免驚惶但此等教匪止係烏合亂民毫無伎倆被官兵剿急四散奔逃不過掠食村莊異延殘喘若能於每村戶擇其精壯者聚集多人互相守望遇有賊匪猝至或軍器未備卽擐鋤瓦礫亦可用以擊賊倘因賊匪逼近卽預先相率奔逃置父母妻子於

不顧任賊匪肆行慘殺焚掠一空豈非自貽伊戚
乎嗣後爾等當堅持定見各保身家不可稍涉驚
惶先行躲避總當聚集壯健結隊保守賊至則合
力迎禦賊去則仍安生業既可捍衛鄉邑亦足保
護室家如此諄切曉示則人知自衛并可省兵力
而靖賊氛如百姓中有首先集勇禦賊立功者先
賞給頂戴俟軍務告竣後送部引見候朕察其

才具分別文武實授以現任職官其辦理妥協之
地方官亦著據實奏明候朕量加獎擢倘不能實
力督辦毫無守禦任聽賊匪闖入本境必將該地
方官以軍法從事决不寬貸至各村莊集勇之費
如係官爲辦理事定後准其據實開銷若係百姓
自行出貲損辦卽將各該處應徵錢糧奏請加恩
蠲免以示體恤如此旨到時陝西竄匪已被額勒

登保等截回向西奔竄距豫省已遠無須集勇防堵卽不必出示曉諭以免驚疑至添調直隸山東山西兵五千名如賊匪已向西趨豫省無須多兵防堵亦可陸續撤回各該省歸伍總在吳熊光斟酌妥辦也

臣等謹案古者寓兵於農卒伍軍旅之制與牛馬車乘相表裏誠以百姓自衛身家較之

勞師遠涉尤爲得力也此次用兵以來蒙

皇上神謨遠燭凡募兵集勇設立堡寨各章程無不
上邀

指示令帶兵大員及各該督撫隨宜酌辦茲因徵調
直隸等三省官兵復

勅令吳熊光轉飭地方官曉諭居民聚集壯健結隊
保守並

諭將首先出力者量加保奏

予以恩擢其後川陝楚均以結寨自固俾賊匪所向
輒窮始能漸次掃蕩用蕪鉅功

睿慮精詳所由預揆勝算也

二十六日戊申恒瑞奏言臣帶兵由蔡家莊至腰

竹溝猴子坪一帶地方據南路探報數股賊匪
俱由鎮安之南復向東北奔竄等語伏思賊數

衆多分股肆竄自應先剿大股

臣

當即折回趕

抵鎮安查縣城附近避難百姓甚多該處亦關

緊要卽派富成帶領兵勇一千五百名在城外

山梁扼要防堵總兵劉之仁患病業已痊愈飭

令該鎮帶領官兵一千名同

臣

一路趕緊抄截

十七日申刻馳抵殺虎嶺探聞賊匪正從界河

竄來

臣

與劉之仁帶兵向前迎剿賊匪隨卽佔

據竹凹山梁排列抵禦督令官兵分路攻擊鎗
礮並發斃賊八九十名該匪退至後面大山時
已昏黑官兵卽佔住竹凹山梁與賊相持一夜

次日黎明令劉之仁率領遊擊韋洪都司董文
珍帶兵由左面進攻副將李天林遊擊李朝顯

等帶領兵勇由右面進攻臣帶領侍衛保邦副

將德忠遊擊安慶等督率官兵由中路進攻又

令侍衛額爾金泰叅領官福協領祿成佛爾卿
額等帶領馬兵由左右山溝繞進以防賊匪埋
伏詭計臣督率三路官兵奮力仰攻賊匪倚恃
人多山險擲石放鎗捨命抵禦我兵不避鎗石
一擁直上鎗箭齊發立斃賊匪七十餘名大夥
賊衆俱向東南敗竄官兵乘勝追殺二十餘里
又斃賊三百餘名奪獲鎗矛旗幟二百四十七

件擒獲活賊周遇順等一百三十六名內有被
襲附近民人夏維章等八十四名訊明釋放外
據周遇順等供稱賊匪大頭目係伍金柱劉添
成曾柳三人夥衆二三萬人分路焚掠餘無要
供均卽正法至此次連日打仗滿漢官兵甚屬
勇往西安委驍騎校成祿身中矛傷陣亡侍衛
保邦右膀中石傷一處兵勇亦有傷亡應俟查

明報部查此股賊匪人數衆多極其詭詐若由漫川關繞道向東奔竄仍必趨赴商維臣卽帶

兵由山陽高壩店一帶趕緊抄截迎頭剿殺再

總兵柯藩患痔甚重不能乘騎查山陽縣並無

防兵該處亦關緊要臣卽令柯藩帶領官兵五

百名駐紮防堵又接副都統國霖來札前在軍

嶺地方截剿楊姓一股賊匪未能竄過要隘現

在帶兵趕赴商維一帶截擊等語但國霖愛星

阿所帶兵力甚單臣撥派叅將張受榮遊擊扎

克丹台清阿等帶領兵勇一千二百名星夜趕

赴國霖處隨同堵剿又札飭鄭西縣知縣孔繼

楹於各隘口厚集鄉勇加意防範勿令賊匪竄

入隣境奏入

上命軍機大臣傳詢恒瑞曰此股賊匪由鎮安之南

向東北奔竄經恒瑞督同剿之仁趕緊抄截斃賊
四百餘名擒獲一百三十餘名恒瑞恐大股賊匪
奔竄商雒卽帶兵由山陽高壩店一帶抄截迎頭
剿殺以遏賊東竄之路所辦俱好伊等旣知堵截
賊匪不合入豫卽深合機宜惟伍金柱等一股賊
匪昨據額勒登保奏稱約有一二萬人向山陽東
竄接據恒瑞來信在小河口一帶截住竄匪帶兵

向西北追剿今恒瑞又稱賊衆向東南敗竄所秦
方向形勢彼此兩不相符殊未明晰或係由西北
轉向東南總以保障豫省爲要至賊匪被剿緊急
有向楚省邊境奔竄之勢此時鄖西一帶祇有道
員恒慶遊擊周龍章知縣孔繼樞等帶領兵勇在
各隘口防禦究恐不能得力若楚省邊境果能嚴
密防範將賊匪截住不令闖入恒瑞卽可在陝境

將賊匪痛加剿殺並將防堵出力之員查明具奏
量加恩獎

同日明亮倭什布奏言各股賊匪闖入楚境分
合無定意在牽制官兵就現在地勢而論以北
面江岸東面荊州當陽遠安等處大道尤爲緊
要是以官兵一面剿殺一面兜攔辦理稍爲費
手前因黃號樊人傑僞元帥陳天朝白號蕭四

線字號向天成等向東路衝突臣等抄道緊接

痛擊不予以暇而青號徐三及羅姓等逆據報

仍在均州地界肆擾雖派有荊州滿兵及督標

兵八百餘名會同該州募勇截殺賊亦不敢窺

伺州城及江面左近但該處較山中喫緊倘竄

過江岸關係非輕必得重兵兜剿初八日在興

山後界坪合總兵孫清元叅將吉林泰等帶領

得力兵勇三千餘名乘勝抄擊樊逆等一股不

令窮奔出境

臣

等統領原帶兵勇二千餘名由

臺口一帶馳赴均州截剿北抵房界青號徐逆

大夥已至房屬高規池方將派堵白濟堡一帶

兵勇圍住千總啟祥腿受石傷把總李永茂勝

受鎗傷兵勇間有傷亡

臣

等聞信督率官兵飛

卽前進殺賊百餘人殲斃馬賊七人奪獲旗幟

烏鎗刀矛甚多十三日在陸家坪連接二仗殺賊二百餘人生擒李開泰等九名正法十五日追至白石沿途逃出良民不少該匪情急仍走均州之孫家灣勢欲繞至保康境內官兵若專事尾躡恐轉迫其東去

臣

等以此股賊勢強

悍馬騾更多須親統兵勇力剿現由房屬青豐等處從東北兜出將該匪逼回山內則辦理庶

易得乎孫濟元一路自初九日追樊逆等至馬
橋口獲勝後十一日在壽陽坪攻撲賊營殺賊
二百餘名生擒何正興等四十二名正法外委
張代鳳鍾廷科各擒得賊目殷發秀王有亮二
名訊無要供當卽正法其乘便投出被窩難民
隨處給照釋放十三十五等日在上龕杼河板
橋堽一帶沿途共截殺百餘人節經札飭盡力

兜剿不令南遁現已截回至竹山之泥灣等處
恐其向竹谿境內竄逸出境已責成孫清元抄
路兜剿苟逆一股前據探報苟文明鮮大川爲
首今據擒獲活賊所供則又稱苟文槐蘇文遠
爲首經派往之遊擊蔣攀龍遏剿未令與樊徐
等股會合卽從興山關至巴東平陽壩及歸州
邊界均經飭令派防之叅將諾音保及該牧令

率領兵勇截堵不令深入今仍在巴屬大寶山一帶游奕該處與歸州與山路路可通已派總兵王凱帶領兵勇二千名率同蔣攀龍專辦此股該匪人數較少設法剿擊可冀得力

臣

明亮

察看賊衆情形總以山徑叢雜往來奔逸爲得計查探各股賊數共計不過六千餘人雖有逼脅民人經

臣

倭什布設法招撫隨裏隨散不致

增賊黨與此時籌定分兵之路各就兵力截殺
襄陽均州各城已另派滿漢官兵防堵若將賊
股逼歸一處既可犄角而進或彼此兵行相近
無論何股仍可迎剿並因房縣爲適中之地酌
留副將滿倉管帶湖南官兵七百名鄉勇八百
餘名暫駐近城處所各路接應兼可防護城垣
臣等惟有併力同心交相儆誠一切熟審機宜

趕緊籌辦以冀先滅一股爲兩鎮表率并申明
賞罰鼓勵官兵勇悍人人用命迅掃妖氛再
日內節據督防西邊卡道員恒慶稟報伍懷
志賊股及張逆餘匪屢撲要隘經該縣孔繼楹
率勇在滾子嶺截擊後賊匪不敢逼近現仍在
鎮安洵陽地界游奕西北兩路各卡尙屬喫緊
該道現督同孔繼楹並遊擊周龍章守備修永

皇朝通志卷一百一十一
三十一
宏等帶領兵勇分投隨方堵禦不致闖入惟鄂
西界外陝境賊匪又據恒慶稟報人數多至萬
餘各卡分置兵勇頗形支絀亟須酌添官兵前
往堵禦而現在截剿防堵正在緊要難以分撥

荷蒙

皇上睿謨燭照令將挑備粵西官兵二千各酌量調

用現已遵

旨覆咨撫臣謝啟昆等即分起飭催來楚以資派撥

至荊州地方緊要一俟日內剿辦稍有頭緒卽

將前調之荊州滿兵一千名撤回原營又

臣明

亮連次接仗知賊人牲口甚多率以馬賊迎敵

步兵驟難衝撲以致未能痛剿必得索倫或吉

林馬隊三五百名在前衝擊乘勢壓剿庶步兵

皆可得力現已咨商經畧額勒登保撥給馬隊

三五百名以應楚省急需伏乞

勅下施行再現在帶兵之員不敷差委相應懇

恩派侍衛四員以資管領馬隊並揀發曾經出師之
候補叅將遊擊各三員迅卽來楚以收指臂之
效奏入

上命軍機大臣傳諭明亮倭什布曰楚北各股竄匪
分合無定其意總欲牽綴官兵乘虛奔突明亮等

察看地勢以北西江岸東面荊州當陽遠安等處
大道尤爲緊要所見甚是聞所奏一切布置均爲
得當稍慰焦勞若能將各股賊匪逼歸一處自可
期一鼓撲滅所稱併力同心四字實爲至要明亮
等務須言副其實又據奏鄂西邊界有伍懷志賊
股及張逆餘匪屢撲要隘經該縣孔繼楨奮勇截
擊後賊匪等仍在鎮安洵陽地界游奕等語此處

尤關緊要陝省鎮安一帶竄匪因額勒登保帶兵
截剿訊據獲犯供稱賊匪欲由鎮安前往商州轉
竄楚北而恒瑞剿辦伍金柱分股之賊亦向山陽
一路奔竄且長麟台布俱在西面分設卡座派兵
攔截賊匪等斷不能向西奔突勢必分股東趨而
郟西邊界祇有道員恒慶遊擊周龍章知縣孔繼
椿等在彼防堵恐不足以遏禦賊蹤明亮等務須

悉心籌畫預行布置毋使陝甘鼠匪闖入鄖西一帶再據秦粵西挑備官兵二千餘名現已咨調俟辦稍有頭緒卽將前調之荊州滿兵撤回原營自應如此辦理至所奏咨商額勒登保撥給索倫吉林馬隊三五百名一節此時陝省截剿正當喫緊之時額勒登保等兵力尙覺不敷自未必能抽撥赴楚朕亦未便降旨調撥明亮等亦不必盼

望此項馬隊現已咨調粵西官兵足資接濟惟當
就現有兵力迅速剿辦以期於閏四月內尅期蕆
事其所請侍衛若由京派往將來事竣又須令其
回京徒勞往返今已降旨特派王大臣於揀選時
添挑曾經出師之都守各二員合之所請叅遊各
三員並令馳驛前往聽候委用俟軍務告竣後卽
交與姜晟留楚補用可也

欽定剿平三省邪匪方略正編卷一百七十

庚申年

四月二十七日

已酉

勒保奏言查高二馬五等股

賊匪前在甘省被剿情急由番地前後竄入川

境統計約三四千人偽立三色旗號其先來之

藍白二號由平武之葉棠堡竄過黑水溝有直

逼龍安之勢後來之黃號由南坪勿各寨竄往

松潘境內

臣

因松潘龍安兩處山徑叢雜在在

有路可通川西是以昨在劍關與德楞泰商酌

分兵

臣

卽轉回金山驛一面審辦魁倫一面卽

就近撥兵截剿甘省竄匪接據探報頭起之賊

初十日竄聚舊堡子地方經百祥帶領兵勇於

孤野山遇賊截擊殲賊七八十名生擒祝世榮

等十三名並帥字白旗一百餘匪向楊柳坪竄

逸緣所帶兵力稍單未能窮追痛剿當卽派令

副將張良槐趙得功等帶領官兵由江油進發
交與百祥管領卽從楊柳坪一路剿辦而後起
之賊由南坪直奔松潘距城祇十餘里經同知
洪範叅將增順帶領兵勇擊退並於雪欄關烟
村寨雲昌等處疊次追殺殲斃一百三十餘名
生擒馬成等四十八名復於木瓜墩趕上賊衆
大半已過鐵索橋尙有百餘名未過過橋之賊

因見後有官兵卽將橋索砍斷落後之賊盡被
殲獲訊出難民譚自伸等六十三名卽行省釋
賊匪過橋後由一馬關奔竄欲與藍白等股合

夥

臣

恐此股賊匪倘由石泉安縣一帶逸出卽

係川西壩地方亟須分兵兜截當派施縉率同
叅將張志林等帶領兵勇由石泉一路進發偵
探賊蹤如果均已竄合卽約同百祥兩面夾擊

此兩賢官兵均於十三日自金山驛起身現在
百祥一路據報十六日在關門子地方遇有賊
匪探馬數十人立時迎殺殲斃二十餘名生擒
五名訊知賊衆已經合夥均在門口寺屯聚臣
已飛飭該鎮等星夜進兵分投掩殺以期一鼓
集事再查潼河東西兩岸各州縣地方人烟本
屬稠密自賊匪搶渡嘉陵江後因向無戒備以

致居民大受荼毒現在潼河兩岸地方均已肅
清而百姓當驚恐之餘四散逃生尙未敢卽時

歸業

臣

目擊情形殊爲憫惻亟須及早安撫已

道飭地方官上緊招集查明實在窮無依歸之
人酌給錢米以資餬口並知會托津於軍需項
不撥出銀數萬兩解赴順潼等府分別存貯

臣

已派委公王府廳分段悉心查辦俟臬司先福

回省後卽令藩司楊揆親赴潼河東西兩岸督
率委員並地方官認真撫卹

勒保又奏言

臣

遵

旨將指出魁倫貽悞各情節會同周興岱逐一審訊
據魁倫供認兩次失於防堵實屬無能負

恩並非有心貽悞

臣

等伏查本年正月初一日當額

勒登保赴陝之時此股敗殘餘孽所剩不過數

百人在大竹一帶游奕不特離嘉陵江甚遠且未竄過渠河而距潼河則更不可以道里計維時魁倫或卽親身帶兵或先派將領馳往截擊何致川西完善地方遭賊蹂躪乃遲至正月十五日始從雷音舖起身由梁山墊江隣水繞路前進賊匪得以肆意稟脅復增至數千人從容渡江是魁倫之罪在賊匪未過嘉陵江以前貽

慢遷延爲最重其時朱射斗在高院塲打仗並
未帶兵繼進接應迨該鎮陣亡又不整頓兵力
亟圖進剿轉退回潼川之鳳凰山劄營嗣李紹
祖一路兵勇到來仍未親自帶往協剿祇以防
守潼河爲名駐營株守查潼河路長灘淺在魁
倫何嘗不知守禦爲難又將兵勇零星分布以
致不能得力任聽賊匪過河且該匪等在綿州

之河東對岸恣意焚燒魁倫總未發兵過河迎
剿百姓心懷怨恨每有擅殺官兵之事此皆魁
倫罪案臣等向其逐條駁詰所供多有矯飾又
奉

諭旨飭查定遠縣裁撤鄉勇是否係孫熙捏稟抑係
實有福寧裁撤之文亦卽向其查訊據魁倫呈
出孫熙原稟乃係上年六月以前之事而自魁

倫到任後並未札飭沿江州縣設圍防守

臣

因

此案現經德楞泰將奉發福寧原呈一併寄交查辦自應調查文卷並訊取福寧孫熙之供方

成信讞且前據魁倫向

臣

告知守備馬良柱等

解送德楞泰一路弓箭火藥在沉香舖遇賊搶
失殺死兵丁數名外委張廷貴帶兵退回馬良
柱被賊衝散單騎行至江油縣屬之中壩場地

方被鄉團疑賊擅殺魁倫因難以辦理卽作爲
馬良柱打仗陣亡並稱弓箭等項均經送德楞
泰軍營飾詞具奏臣以此事大有關係現經調
取同行之弁兵來營查訊尙須時日是以未將
魁倫按律定擬罪名謹將審訊魁倫供詞並呈
出案據先行恭呈

御覽刻下龍安一路正須臣馳往督剿而案情未結

質訛需人臣不能久駐金山驛等候致悞軍務
昨已檄調先福來營卽令押同魁倫赴省至道
員劉清係奉魁倫札委在潼綿一帶督率巡防
止係統轄而非專責已遵

旨將伊革職歸案辦理其餘疎防文武各員俱已分
別革職解任交臬司先福秉公查訊奏入

上命軍機大臣傳諭勒保日高二馬五等股頭起賊

匪竄至舊堡子地方雖經百祥帶兵截擊僅殲賊
七八十名未能窮追痛剿其後起之賊由南坪直
奔松潘經同知洪範叅將增順帶領兵勇擊退並
於雪欄關等處疊次殺賊復將未經過橋落後之
賊盡數殲獲甚爲奮勇著將洪範增順二員查明
出力實蹟應如何獎擢及伊二人曾否賞戴花翎
併查明奏請候朕降旨加恩以示鼓勵勒保現

派令施縉等由石泉一路進發與百祥爲兩面夾擊之計而該督於審訊魁倫供詞後卽從金山驛帶兵馳往務須督率鎮將等奮力截剿趁藍號白號黃號等股賊匪會合一處之時卽在龍安境內悉數殲擒方不負朕棄瑕錄用之恩又據奏審訊魁倫供詞各款其貽悞罪狀俱已供認現在勒保旣帶兵前赴龍安自無暇審辦已交王大臣等定

擬具奏無須勒保在彼審擬惟疎防嘉陵江之知縣孫熙及派守潼河之遊擊王之鑑通判連彭年並統轄巡防之道員劉清節次降旨交勒保查審該督仍當遵照前旨審訊明確一併分別定擬具奏至守備馬良柱等解送德楞泰一路弓箭火藥遇賊搶失外委張廷貴帶兵退回馬良柱被賊衝散行至中壩場被鄉團疑賊誤殺魁倫以事難辦

理作爲馬良柱打仗陣亡一節魁倫重罪在縱賊
搶渡嘉陵江及竄過潼河二事現已按律定罪馬
良柱業經身故即使魁倫前奏屬實於魁倫之罪
亦不能減若係飾詞誑奏其罪亦無可再增惟張
廷貴因遇賊搶奪弓箭火藥卽帶兵退回與臨陣
脫逃者何異如果屬實竟當卽行正法以肅軍紀
若因賊數較多衆寡不敵打仗受傷後始行退回

亦當查明叅奏或予以枷號發遣分別示懲至馬
良柱前已諭令咨部賜卹今查係被賊衝散爲鄉
勇所殺自應將卹典撤回倘實係打仗陣亡仍照
前旨賜卹又綿州知州劉印全稟請魁倫撥兵三
百名魁倫不肯給發該州繼之以哭僅率鄉勇堵
剿以致淪陷多名一節魁倫供稱並無其事殊不
可信現有劉印全及該處鄉勇可証並著勒保詢

問確實具奏至所奏潼河東西兩岸各州縣被難
民人酌給銀米知會托津暫於軍需項下撥出銀
數萬兩解赴順潼等府分別存貯等語成都省局
現存銀兩儘可動用達州爲各路軍需總滙之所
昨曾有旨令托津將省局存餘銀兩提往達州備
用豈有轉向達州支取之理所有此項撫卹銀兩
著勒保轉飭藩司楊揆卽於省局內酌量動撥但

須查明實在窮無依靠之人實力撫卹不可漫無區別濫行分給致啟浮冒之弊

上諭內閣曰朕在藩邸不識魁倫受璽以來伊亦未曾入覲去年魁倫至京時召見始識其人覺伊言論通暢心直口快似無欺隱是以命伊暫署吏部尙書事務頗能整飭部務伊前在閩海關應賠短少盈餘銀十八萬六千餘兩竟手無可措繳請將

住屋入官餘在養廉內分年坐扣朕憐伊外任多年毫無積蓄清介可嘉特旨免交銀九萬六千餘兩又將所呈房屋賞還嗣因勒保安坐軍營辦理遲悞降旨拏問另授額勒登保爲經畧統兵剿賊其總督事務命魁倫於七月間馳驛赴川署理兼辦達州軍需原未令伊剿賊陞辭時諄諄面諭數千百言用其爽直戒其鹵莽親解荷包手賜以寵

其行伊起程後在途間用六百里加緊之摺妄報
徐添德等窮蹙之信彼時朕卽不滿意降旨訓飭
至達州後辦理糧餉又與廣興意見不合屢次密
叅俱無實據然廣興之少年任性朕所素知屢於
伊奏摺中嚴加申飭而廣興辦理糧餉實無貽悞
况節次運川之餉被私筠截留至九十餘萬之多
廣興能搏節妥辦不形匱乏魁倫祇知欲去廣興

於地方防堵要務毫不介意至十二月間額勒登保因竄陝之賊較多川北之賊無幾以勒保爲鑒不敢逗遛親至達州與魁倫面商留阿哈保百祥朱射斗併官兵四千餘名令魁倫督率進剿隣水大竹一帶賊匪彼時伊若自揣才力不及實不能任此重大之事額勒登保亦必另委別員督率仍令駐達州專辦軍需伊竟不度德量力直任不辭

額勒登保於元旦帶兵由達州起程赴陝若魁倫亦於元旦帶兵追賊雖不能必掃穴擒渠而不予以暇斷無意外之變乃魁倫以置辦兵丁鞋襪爲名在達州安坐八日又不差人偵探沿途又緩程前進僅奏報聞有殘敗摸樁賊匪冉添元等在悅來場搶渡經官兵擊退等事朕卽覺其不妥降旨申飭催令速進旋卽奏報賊匪於十五日在定遠

縣石板沱地方踣淺過江擾及從未被賊之地以
完善膏腴之各州縣遭焚掠殺戮之慘實有不忍
言喻而魁倫渡江追賊仍不上緊僅令朱射斗領
兵前進伊仍駐蓬溪附近地方將寄廣興書信數
件陳奏必欲去之其不知緩急僨事喪心一至於
此朱射斗旋即陣亡賊勢益熾彼時原欲將伊革
職拏問奈無人接署是以令伊嚴守潼河俟德楞

泰統兵進剿爲一鼓殲擒之計伊亦繪圖進呈星
羅棋布分派兵勇日夜嚴防朕屢降諭旨以潼河
爲伊生死關頭一誤豈容再誤諄諄訓勉及德楞
秦統兵進剿轉戰直前擒獲首逆十餘名殲戮及
投首解散者幾及萬餘朕卽降伊爲三品頂戴以
完嘉陵江之案少示薄懲實爲輕縱孰意魁倫薄
福小人不能受恩復於三月十八日賊匪由太和

鎮王家嘴搶渡遼河致河以南居民又遭殺戮使
德楞泰三戰之功皆爲虛舉若不將魁倫按律治
罪則是朕迴護自己用人錯悞之咎廢我大清國
之法朕非庸碌無能之主也卽將伊革職拏問合
欽差侍郎周興岱同署總督勒保嚴審魁倫定擬
具奏茲據審明情節又究出魁倫妄報管解火藥
營官陣亡一事供詞尙多矯飾未經定罪現據勒

保將魁倫送至成都監禁拜摺後卽統兵赴龍安
剽賊此事著在京之儀親王成親王大學士軍機
大臣刑部各部滿漢尚書會擬罪名具奏

同日

上諭內閣曰王大臣等會議魁倫罪名請將魁倫照
例擬斬立決卽於川省正法所擬甚爲允當魁倫
係朕特命署理四川總督承辦軍務種種債事較

之景安承保貽悞於前者其罪更重難以寬貸卽
如和珅爲

皇考任用之人朕因其擅權執法卽於親政數日內將
伊拏問治罪賜令自盡况魁倫係朕特用之人豈
肯稍存迴護伊又並非親近之臣罪狀昭著有何
足惜卽照王大臣等所擬將魁倫在成都正法實
屬罪所應得但思前次拏獲教匪賊首冉添元陳

得倅俱在成都凌遲示衆今魁倫曾任本省總督
大員若亦在該處辦理不特有關國體且恐百姓
蔑視本省大員易長刁風非於魁倫尙有姑息也
魁倫現在成都監禁著楊揆先福派文武妥員將
魁倫解京沿途務當小心管押若稍有疎虞致魁
倫畏罪自盡必將該解員從重治罪俟解到時仍
交此次派出會議之王大臣等同赴刑部復加審

訊照原擬罪名具奏候朕再降諭旨

臣等謹案賞罰爲用人大柄而況軍旅之際尤爲衆心向背所關萬姓安危所係魁倫身膺

簡命署任川督地方軍務皆其專責乃先於進剿隣水大竹一帶賊匪時並不自揣才力直任不辭輒於達州安坐八日致令賊匪偷渡嘉陵

汀已屬遲悞仰蒙

皇上量予薄懲

訓誠嚴明宜何如勉圖自贖乃仍不知儆畏復任賊
匪竄過潼河使完善地方致遭蹂躪失律之
罪實無可辭我

皇上大公至正揭示罪狀復

諭令解京審擬洵所謂

仁至義盡者矣

同日胡季堂奏言

臣

臣昨奉調兵一千名現據

正定鎮札勒杭阿稟報業已照數挑派齊全頭
起五百名派令曾經出兵之遊擊明祥帶都守
四員並每兵一百名派千把外委二員管領於
二十六日起程後起間日行走茲又奉

諭旨續派兵一千名

臣

面諭臬司同興將該處需用

車馬在於附近州縣酌量添調協濟尅日齊集
並寬爲預備俾得隨到隨行一面飛飭正定鎮
卽將代防及附近各營內再挑精壯兵一千名
配帶鎗械火藥鉛丸礮位等項派委諳練勇往
員弁帶領仍作兩起俟前撥後起兵丁起行後
卽接續前進徑赴盧氏一帶聽候吳熊光調撥
奏入報

聞

二十九日

辛亥

那彥成奏言

臣

由石泉漢陰境內

迅速僭行聞伍金柱曾柳大股賊匪與自甘竄
來之楊開甲南山新起之龐國勝等合爲一股
在洵陽山陽鎮安交界各處滋擾勢甚鳴張隨
取捷徑由恒口翻山前進過黑虎廟古木嶺紫
漢嶺梅子嶺等處山高路險多有牽馬步行之

處每日行走總在百里以外二十日至表德鋪

探明大股賊匪在分水嶺一帶屯聚是日又有

一小股賊匪竄來合夥分水嶺爲鎮安要路距

營七十里

臣

卽於二十一日酌留兵丁看守營

盤挑選奮勇兵丁三鼓進發黎明行抵黃龍鋪

遇賊探馬數十人迎頭截殺緊趕前進適遇賊

匪迎來我兵直前奮擊追殺二十餘里殺賊三

十餘名及抵分水嶺復有大隊賊匪據險排列
預備拒敵該處南面北面大山環抱連接支嶺
二重均高十餘里地勢極爲險峻賊匪佔據三
面山梁夥黨甚衆復分鎗手矛手四股迎至半
山臣將所帶兵勇亦分四路令札克塔爾綸布
春桑吉斯塔爾慶成帶領臣別帶一隊在一小
山包上堵住抄截之路接應各兵賊匪恃其人

衆火器較多開放連環拚命下撲山上賊匪滾
落巨石吶喊助勢綸布春桑吉斯塔爾兩路由
右手進攻搶上支嶺衝壓三次鎗箭齊發殺賊
三百餘名札克塔爾慶成兩路由左手進攻山
尤險仄賊匪甫將鄉勇壓下甘涼固原兵丁衝
冒鎗石爭先競上攬殺一處賊匪見我兵勇猛
撤退里許又復衝壓往來數次札克塔爾從嶺

旁斜坡衝上慶成急帶王延年等數人搶住山
梁我兵一齊競進賊匪抵敵不住遂將左手支
嶺奪據殺賊四百餘名維時四路官兵雖已攻
得支嶺而大梁上三三向賊匪尙在我兵之外復
抄下一股餘匪欲截我兵之後見臣所帶官兵
先已有備堵住來路遂卽奔回官兵與賊力戰
良久自卯至酉賊始全行敗退分作三股奔竄

官兵追過大山時已酉末探得賊匪大夥竄向西南遂帶官兵回營探明賊蹤卽就近赴西南進剿此次共殺賊七百餘名奪獲大礮二尊散出難民男婦三百十二名口俱經釋放其臨陣生擒賊匪十四名內有杜相係掌旗賊目李自金久在賊中深知賊情訊據供稱此股係伍金柱等大股還有伍懷志曾姓分管衆賊劉元帥

總在前面打仗自搶渡漢江至南山嶺人甚多
近在鎮安破了幾處巖洞又有洵陽同教罷國
勝等帶二千餘人投入賊營楊開甲等一股及
南山舊有一小股俱已合夥總要向河南湖廣
奔竄因山陽有兵堵截要想從鎮安縣城繞道
東竄今被官兵剿敗自必折回等語正在訊問
間又有續行投出難民徐廷福一名據供我在

鎮安黃龍舖住家四月十九日被賊裏去拴令
燒火做飯二十一日官兵打敗賊匪後是夜聽
見賊棚內眾人嘆說自過漢江從未喫此大虧
此次折傷數百人伍元帥受傷甚重又無醫生
醫治六元帥亦被礮打死我因賊看守稍鬆連
夜逃出等語質之杜相李自金供亦相符惟稱
賊目有劉元帥並非排行第六因各處口音不

同所以稱呼不一餘無要供當將杜相李自金
放生擒賊匪俱卽正法伏查伍金柱曾柳一股
最爲狡悍黨與約二萬餘人在南山內東南一
帶滋擾日久焚掠甚慘民間耕種失時田畝多
已荒蕪山內本多習教之人又兼乏食如龐國
勝之新起附賊者實繁有徒現在已被我兵截
剿並據難民活賊供明首逆得受重傷賊目劉

元帥業經礮斃但賊黨尙衆仍須併力痛剿必
須先將此股撲滅方不致日久蔓延額勒登保
現在鎮安以東剿賊相距尙不甚遠臣擬與會

合籌辦務期合力剿淨此股於大局更有裨益

同日吳熊光奏言竊臣接據探報陝省一大股

賊匪於十九日由山陽屬之合河翻千金嶺等

處竄至賀家廠一帶屯聚在山陽縣正南距城

一百二十里恒瑞等帶領官兵五千名赴山陽城外截剿現聞已竄過山陽又有一股係辛楊韋三姓賊匪竄入商州國霖等未能攔住於二十日竄至保安街一帶距雒南縣城三十里並無官兵跟剿等語查雒南縣屬與豫省盧氏接壤臣恐該處兵力稍單於前調陝州等營兵丁三百名外又札調都司楊景芬就近帶兵七百

名速赴藥莊幫同鎮臣常林防堵日內可以到

彼

臣

復疊囑該鎮務須督率將弁兵丁探蹤嚴

密防守似可無虞因思上年五月間張逆一股

竄至雒南經官兵攔截卽折向南趨由富水關

闖入豫邊經

臣

督兵擊退此次賊匪又竄往雒

邑仍恐其被擊折向南奔且山陽迤東亦可直

達浙川邊境尤宜豫爲籌備查荆子關距富水

關及鎮臣田永桐駐紮之青山梁均屬不遠

臣

已由鄧州前來於二十三日行抵荆子關現擬暫爲停住設雒南之賊折向南趨或山陽之賊未能攔堵均可在此就近調度並可兼顧江防至楚北賊匪現探前二股在房縣一帶竄匿距江岸漸遠惟均州一帶竄匪尙在元樂門草店等處距江岸之浪河口青山港地方均不過七

八十里不等是江防並關緊要臣前督率臬司

完顏岱等添團鄉勇千餘名將開封練勇騰出

原擬調赴西路協防今因均州竄匪尙距江岸

不遠臣輕騎減從趕赴荆子關仍將開封練勇

留駐江干預備渡江剿賊臣在鄧州起程時卽

諄飭完顏岱等務於江岸慎密巡防留心稽察

萬不可以一江可恃遠存大意臣惟盡心竭力

相機固守斷不敢稍涉懈弛均奏入

上命軍機大臣傳諭額勒登保那彥成日前次額勒
登保知陝省東面緊要帶兵趕赴鎮安一帶兜剿
此次那彥成探聞伍金柱等大股之賊在洵陽山
陽鎮安交界各處滋擾亦知陝境東面甚關緊要
卽統兵由捷徑趕往督率綸布春慶成等奮勇進
攻奪據支嶺賊匪敗退分作三股奔逃復經官兵

追至大山共殺賊七百餘名大夥賊匪竄向西南
所辦俱好但西南係屬何處地方摺內未據聲叙
現在那彥成探明賊蹤卽就近赴西南進剿務須
乘勝直前設法抄圍裹截速將此股賊匪上緊剿
除斷不可令其東竄豫省亦不可逼令入楚現在
長麟台在西南兩面扼住賊匪去路額勒登保
由東北擊躡賊蹤前有攔截後有追兵賊匪自無

從他逸可望一鼓殲除至陝省賊匪奔竄地方及
現在何股賊匪係何人剿辦陝境州縣與楚豫二
省州縣交界地方相距若干里著額勒登保等按
照方向繪一簡明地圖附報進呈以備查閱再恆
瑞前奏截剿伍金柱等大股賊匪恐其奔竄商維
卽帶兵由山陽一帶抄截今那彥成所剿亦係伍
金柱一股何以未見恆瑞帶兵夾擊又國霖前奏

在商州軍嶺地方將賊匪截回本日吳熊光奏稱
賊匪竄入商州國霖等不能攔住或係國霖前奏
不實或又係一股賊匪竄至國霖未能截回均著
額勒登保查明具奏

上又命軍機大臣傳諭吳熊光曰那彥成奏賊匪伍
金柱楊開甲龐國勝會柳各股在洵陽山陽鎮安
等處滋擾那彥成已統兵至東面將賊匪截柱剿

殺賊匪向西南奔竄等語陝境大股賊匪既折向西南離豫漸遠但據該撫奏山陽一帶竄匪國霖等未能攔住該處與豫省盧氏接壤現派令都司楊景芬帶兵速赴藥莊幫同鎮臣常林慎密防堵吳熊光務當確探賊蹤認真堵截勿使一名闖入至新調直隸山東山西官兵五千名應會同定住酌量分佈不獨陝省交界應行嚴密防堵卽湖北

漢江一帶亦仍須分兵駐守此時均州一帶賊匪
尙未剿淨江防甚關緊要吳熊光應飭臬司完顏
岱等督率兵勇一體嚴密防範

同日伯麟奏言

臣

查大同兵丁留蒲駐守者現

有一千名業經飛飭原派領兵官弁就近迅速
渡河先赴盧氏至前次撤回大同兵一千名除
陸續歸營外尙有兵六百名甫過省城相距不

遠尙未歸伍現在飛道安弁飭令轉回迅赴盧
氏至大同兵丁已有一千六百名尙缺四百名
若再由大同鎮調撥路途遙遠誠恐緩不濟急
臣 卽飛咨太原鎮就近於前次調滿撤回各兵

內挑撥壯健兵四百名並令星速接踵前往湊
足二千名之數約計旬日均可全數渡河不敢
稍致遲悞所有領兵大小官弁俱係前次派定

且經臣在蒲之時逐細考驗均屬勇幹惟統領

各兵必須鎮將大員查山西現祇有大同鎮總

兵一員此外皆係叅遊等官茲有現護太原鎮

總兵印務叅將富德平日督率弁兵訓練技藝

尙屬認真臣現已飭令該將統領官兵迭赴盧

氏以資調用奏入

上命軍機大臣傳諭伯麟曰伯麟奏奏足二千名兵

數迅赴盧氏豫省得此兵力足資防禦惟蒲州地方與陝境毗連旣將駐守該處之大同兵調赴河南蒲州沿河一帶不可無兵防守著伯麟仍酌派官兵駐紮蒲州以資守備